


Grupo "ILA cu cd cu a bira popular den corto tempo



ORANJESTAD(AAN):---

Un CD cu siman pasa a sali riba mercado y cu den poco tempo a bira masha popular cerca no solamente hubentud, pero cerca adultonan tambe, ta e CD di grupo "ILA" cu titulo "den e templo aki". Grupo ILA ta consisti di Sr. Ricardo Croes, y 4 di su 5 yiunan, Alex percussionista, Elix cu ta bahista, Arianne lead guitar, y e chiquitin Ricardo, amigonan Eribert

"Beach" Delamarre riba keyboard, y Jeffrey Geerman, drummer.

Un CD cu prome cu el a bay pa lugarnan cu ta bende CD riba nos isla, ya tabata tin masha encargo y a wordo bon bendi, y cu ultimo dianan ta bendiendo hopi.

Si scucha e cancionnan ta haya den nan mensahenan religioso, mensahenan pa hoben y adulto, protestanan, tanto canta como papia, cual-

nan a pega fuerte.

Nan ta "Salmo", "E tempel," "Guia nos" y "Fe" cu ta esnan cu tint religioso y na mes momento cu menasehanan positivo o protestanan, y "Tur dia", "Mira kico bo a para bira" y "Habri bo wowo" cu ta esnan mas bien di protesta y mensahe combina.

E salmo por ehemplo ta ser canta den forma di meditacion y Ricardo ta menciona entre otro, cu tur loke e haci e ta prospera, y "tur esaki ta loke Tata di."

"Feliz ta esunnan cu no ta anda segun conseho di mal hende, o cu ta pega riba caminda di malvadan y cu no ta sinta den touw di cheredornan, pero pa nan smaak ta hinca den ley di Dios unda nan ta medita di dia y anochi".

Y mas aleu e ta menciona cu "Leynan di mundo ta unda nan ta, cera complot cu gobernantenan, riba su trono den cielo Dios ta hari y haci mofa di nan".

E cancion "E tempel" ta cu-

minza cu Ricardo splicando papia, cu "nan ta bisabo cu Dios ta biba den iglesia traha di piedra cu palo, ami ta bisabo cu no. Abo ta cas di Dios, respeta bo curpa, respeta bo mente, respeta bo spirito." E coro ta contesta cantando "ay ki dushi pa sa cu Dios ta biba den mi, ay si, ay ki dushi".

Un di e cancionnan cu a pega fuerte ta "Tur Dia" y aki atrobe por ripara e protestanan y mensahenan cu Ricardo ta trece dilanti como introduccion bisando: "Abuso ta wordo cometi tur dia rond mundo, contra hende grandi, hende jong, mucho chiquito hasta esunnan cu no a nace ainda. Ora nan nace tin problema ta warda nan caba. Esey no ta kita cu bo por tin bo fe cu ta haci e diferencia tur dia." y e ta canta: "Tur dia mainta tempran mi ta lanta adora mi Dios, y abo anto?"

Y e ta sigui canta entre otro cu "tur dia e criminalnan ta planea otro bofta. Tur dia e hende mal ta planea con pa por horta, tur dia e mucha chiquito su cuida ta bay atras, tur dia mucha chiquito ta wordo abusa, mucha chiquito su futuro ta wordo trapa".

Riba droga e grupo tin como di 4 cancion, "Mira kico bo a para bira" e ta cumenza na splica cu "awendia na Aruba combatimento di droga ta tuma lugar den un forma masha straño. Nos prison ta rand rand di gulidornan di bolita. Cayanan ta pata pata di humadornan di piedra, pero asina mes nan a habri e ruta pa Hulanda pa un kilo, pa un kilo y mey. Tur hende ta combati marihuana, mien-

tras alcohol ta un desaster cu nos tur sa di dje. Fundacionnan ta landa fundacionnan ta cai y mi no ta mira cambio. Keda fo di droga, keda afo!! Den e cancion mes ta ser menciona "mira kico bo a para bira, tempo mi a conoce bo, bo no tabata asina".

"Hende bon bo ta di educacion, hende bon bo ta den bo curazon. E droga no ta haci ningun distincion, e ta caba cu bo, e ta matabo.

"Homber bon studia ta cana anochi riba caya manera un pober ta pidi placa pa e por bay huma su piedra, su yiunan chiquito na cas, nan mama no tin placa na cas.

E muchanan no a bay school, nan no a desayuna. Awe ningun hende sa, nan no sa esaki mas", e ta canta entre otro.

E otro cancion cu protesta ta "Habri bo wowo" den cual e ta menciona cu riba mundo ta pasa hopi cos, pero enberdad, ken bo ta kere ta responsabel? Esnan na mando of esun cu ta wordo dirigi? "Habri bo wowo y wak bon".

Aki ta ser haci diferente pregunta cu ta termina cu "wak bon ken ta goberna, wak bon kende ta manda, wak bon ken ta autoriza, wak bon ken por manipula, ken ta esnan cu por gaña". For di aki pa final di e cantica el a hinca e oracion "Nos tata," den e cancion mostrando cu "wak bon con Dios a siña nos reza".

Tur e cancionnan tin nan texto tanto na papiamento como na ingles riba e booklet di CD cu ta na Zapp music y Galeria Moderna y hey You Snack y cerca Ricardo mes na 9943210.